



Serafin al puartave i bregons curts cun lis tiracjis. Al jere il codarûl di une crime di birbants, che a torzeonavin pal paîs dome cul fin di fâ dispiets, no jerin seletîfs, dut ur vignive ben.

A vevin cjapât di smire la puarte di une cjase, misurât il larc de stesse, cuntun mani di scove a fracavin il boton dalcampanel, incjastrant chê altre ponte te part opueste dal telâr.

Napoleon, paron dal prin plan, sintint la insistence de sunade al vierzeve il barcon e cuntune vosone che jemplave la place al domandave: - cui isal? -, un assolût cidinôr i rispuindeve.

Indalore l'om, a riscjo di colâ, al meteve infûr il pet fintremai che al rivave a viodi il mani de scove..., intant, la mularie platade chi e là, si tignive la panze dal ridi sintint la sfilze di impropieris.

Une dì, il plui ligjere de trope, al rivà cuntun mieç pachet di sigarets strafuîts al pari, intun bati di cee a lerin tal ronc e alì a armarin un fumaron ae turche! Ancje Serafin al tirà cualchi bugade, di bot al scomençà a vê inzirli e a tossi.

A Serafin dutis chestis ingjenuis birbantadis i provocavin te sô cussience un sens di colpe. Savint che dutis lis sabidis, tal daspòmisdi, la mulariee e veve l'oblic di confessâsi, Serafin al decidè di fâlu cul vicjari, za che chest al jere dûr di orele e al veve simpri premure, cun di plui no ti viodeve in muse, za che la gridele dal confessionari ju separave. Il frut, tremant si inzenoglà riferintji i "pecjâts", cuant che al rivà ae "fumade", il vicjari, remenantsi, i fasè une ramanzine che lu spaventà a tal pont, che il frut al scjampà cence spietâ la pinitince. Tal doman al veve di cjapâ la comunione, ma il dubi di vê inmò i pecjâts svoletant intor si lu lambicave.

Balinant dentri de glesie al decidè di confessâsi di gnûf a muse scuvierte cul zovin capelan.

Rivâts al pont debil, il predessut, riduçant, al alçà la man diestre fasint la segnâl de crôs: -

“Ego te absolvo in...” -

Manman che la litanie e avanzave, Serafin le sintive come mane dal cîl che lu bonave di chel ingôs che no i deve padìn ni di dî, ni di gnot.

di Galliano di Buenos Aires